

STEPHAN GERKE

DOCTOR



1542



Elarungo hysen gefortt dieß Buch
wirdt in hokommun in
der Kinder Teilung

Anno 1569

in die Bar,

colomij C

Handt mit

ausgeri Moritz

Ex libris Christophori Noici
Lunoris, civis Quedlingburgensis
Anno reparatae Salutis

1599.



15

15


lof

Sammelband

135



Expostulation vnd
 strasschrifft Satane des
 Fürsten dieser welt / mit
 Hertzog Weintzen von
 Braunschweig / seinem ge-
 schworen diener vnd lieben
 getrewen / das er sich vnbil-
 licher weise / in der person
 eins Diephencfers wider
 den Landtgrauen / nicht one
 mercklich nachteil / seines
 Reichs / mit vnge-
 schicktem liegen
 eingelassen
 habe.



Faint, illegible text, likely bleed-through from the reverse side of the page.

Wir Satanas / von vnsern
selbst gnaden / ein vnüberwindlicher
Herr dieser welt / vnd verweser der ewi-
gen finsternus / Entbieten dir hertzogen
Heintzen von Braunschweig / vnsern
geschworen / ergebenen vnd getrewen diener / vnsern
grus junor an.

Lieber getrewer / Vns ist heut / vngeuerlich vmb
acht vhr / da wir in mercklichen geschesseten vnd rath
schlegen gefessen / vnd mit den vnsern berathschlagt
haben / wie man doch vnsern lieben getrewen / den
vermeinten geistlichen / stattliche hilff / vnser reich lens-
ger zubehalten vnd zuerweitern / leysten möcht / ein
auschreiben zuhanden komen / mit einem solchen
Titel.

Euangelische / brüderliche / getrewe vnder
richtung / durch meister Justinum Warsas-
ger Nachrichter zu Warheitsbrun / in ei-
nem sendbrieff dem Landtgrauen beschehe.

Dasselbige weil wir von stundan deinē fleis hies-
rin vermerckt / haben wir fleissig gelesen / vnd nicht
anders befundē / den das du noch / wie ein geschwor-
ner vnd ergebner diener / alles was zu fürderung vns-
ser preeminenz vnd reputation / des gleichen zuers-
haltung vnser Reichs dienet / auff's trewlichst aus-
richtest / vnd hierin keinen vnfleis bey dir finden las-
sdest. Mögen auch mit warheit sagen / Wenn du dich
in die gute wercke / so wir dir / vnd allen vnser Reichs
verwandten / gegeben vnd geboten haben / als neme-
lich Christum vnd seine anhenger verfolgen / vnschul-

A ij

dig blute

dig blutt vergiessen/ Junckfrawen vnd frawen schei-
den/ liegen vnd triegen etc. recht zuschicken wüsstest/
vnd die selbigen vnder einem rechtshaffenen schein
vbtest / das wir als denn in viel tausent jaren/ getre-
wern diener nie gehabt hetten / vñ müsten sich Nero/
Caligula/ Julianus Apostata / Valens etc. vnd an-
dere mehr/ so vns doch gar getrewe dienste geleistet/
wenn sie mit dir verglichen wurden/ verkriechen.
Denn eigentlich steht dein hertz auffrichtig gegen
vns/ welchs wir auch in gnaden gegen dich zu seiner
zeit gedenccken zuerkennen/wenn nicht sorge were/
du wüdest mit deinen vngeschickten / vielfeltigen/
vnd vngehörten scheltworten/vns vnser sachen gar
verderben/vñ was wir bisher heimlich beratschlagt
vnd aus deinem anregen mit vnsern lieben getrewen
den verstockten geistlichen beschlossen / gar an den
tag bringen.

Demnach haben wir fur gut angesehen/dich
als vnsern getrewesten diener / etlicher ding zuerin-
nern/vnd wie du dich hinfurt besser in vnsern dienst
schicken sollest / anzuzeigen/denn in solchen sachen/
so dir/als einem vns verwandtem hauptman/auffs
zurichten befolhen / mus man nicht zu gar frech
sein/odder auch so gar seher zum blutuergiessen ei-
len / sonder der sach vorhin ein gestalt machen/das
man aller welt leut/das ist/vnser Reichs verwand-
ten / alle sampt vorhin an sich bringe/sonst würde
man vnser wesen für Teuffelisch vnd Tyrannisch
ansehen/vnd den grossen hauffen von vns gantzlich
abschrecken. Siehestu nicht lieber getrewer/wie sich
in solche vnser dienste die verstockten geistlichen
bisher

bissher geschickt haben? Die selbigen sein nicht so
balde mit gewalt gefaren/sonder haben irer/ja vnser
sach/mit hübscher vnd gleissender heiligkeit/ein ges
stalt gegeben/vnd also alle welt an sich gebracht/ja
haben sie nicht alle zu vnserm Reich gehörige werck/
in nomine Domini angefangen? Also pflegen auch
wir/wenn wir mit liegen vnd triegen die welt an vns
zihen wollen/vns in einen engel des liechts zuuer/
wandelen/wer wolte vns sonst glauben?

Das Exempel mit Ihesu von Nazareth/wie
wir mit dem selbigen vmbgangen/da wir in an das
Creutz gebracht haben/magstu dir für die augen
stellen/Erstlich haben wir die hohen Priester vnd
Phariseer wider in gehetzt/das sie dem volck haben
müssen einbilden/er sey ein verfärer/ein falscher Pro
phet/mit dem Teuffel besessen/handele widder ir ges
setz/Moysen/Ceremonien/Tempel etc. Sein damit
drey jar vmbgangen/bis wir in beim volck gantz
vnd gar verhasset gemacht haben/vnd ist gleich wol
dis alles geschehen/in dem schein/das er wider ir ges
setz handelte. Da wir nu den gantzen hauff auff vns
ser seiten gebracht/vnd vnser sach gewis waren/da
sind wir zugefaren/vnd haben bey den vnseren vers
schafft/das sein blut wiewol vns dadurch nicht ein
geringer schad geschehen/des wir vns nicht versee
hen hetten/hat vergossen werden müssen. Auff solche
weise mustu auch (du wöllest vns denn vnser ganz
tes farnemen vmbstossen vnd vorderben) deinen
sachen ein gestalt vnd farbe geben/vnd nicht alles
auff solch weibisch schelten/schmehen/vnd lesteren
stellen.

A ij

Dein

Denn ob schelten / schmehen vnd auff die leute
dichten / wol in vnser reich gehört / vnd du am selbigen
recht thust / so mus man dennoch / vnser kunst
vnd gewonheit nach / der sache ein solche gestalt geben /
das nicht yderman vnser lügen spüren / vnd das
es grobe lügen sein / greiffen möge. An liegen vnd
triegen / wie wir dir befolhen mangelt dirs nicht / allein
an der kunst / fein fiserlich vnd kunstreich zu liegen /
mangelt dirs / solchs wollen wir dir gnediger
meinung / aus deinem sendbrieffe für die augen stellen /
mit beger / du wöllest dich / damit vnser sache nicht
der maleins durch deine frecheit verderbt werde / mit
deinen scribenten heirin anders schicken.

Erstlich den tittel deines sendbrieffes belangend /
gefelt vns gar nicht / das du solchen abdruck / im
namen eines nachrichters oder diebhengers hast lassen
ausgehen. Denn es wird freilich solchs / weder
Keiserlicher Maiestat / noch anderen Fürsten
Deutscher Nation gefallen / das ein Fürst / er sey
gleich wie er wolle / durch einen diebhenger / was
sich zu thun gebüre / erinnert vnd ermanet werden
sol / so ist auch der Landtgraff nicht so gar freundslos /
das niemand vnder den Fürsten sein werde / der
sich solcher vorachtung nicht auffs höchst sollte annehmen /
Was ist der halben von nöten / das du beide dir vnd
vns has vnd widerwillen erregest / da es sonderliche
vnd hohe nodt nicht fordert ? Du hettest solchs
durch ein ander person / als eins Abts oder münchs
oder pfaffen / weil alles / was wir thun / anfenglich
in engelischer gestalt geschehen sol / können
ausrichten.

Ober

Uber das wirstu nu vrsach beide vnsern vnd
deinen widersacheren geben/das sie dich hinfurt für
einen nachrichter oder diebhenecker / der vnbillicher
weise vnd schendlich Doctor Dillinghusen / Dieterich
Schnellen / die Gosslarische Burger / vmbge-
bracht haben solle/halten vnd ausschreien werden.
Vnd wiewol du in dem allen/wider vns nicht allein
nicht gesündigtet/sonder recht gethan hast/so weistu
aber dennoch/das etliche ehrliebhabenden Fürsten/
die vnserm erbfeind Christo anhangen / solche thaten
nicht gefallen werden / möchten auch erleiden/
du vnd die deinen/hetten solche thaten/da sie mit vn-
ser hülff geschehen/vnd wol volzogen waren/heim-
licher gehalten. Denn du weist je/das alles was aus
vnserm eingeben vnd namen geschicht/ mit häbs-
cher/feiner gleisnerey vnd vermeinung gefeibt vnd
geschmacket sein mus.

Das du auch baldt in gemeltem titel/ mit so
grewlichen schmehe Worten heraus fereist/vnd Dan-
sen Kochen/der etwan dein verzogener son gewesen/
vnd alle deine heimligkeit weiß/der massen antastest
ist auch mit gutem radt nicht geschehen / denn weil
du für anderen/als vnser geschworne vnd ergebnere
diener/die alten kirchen breuch/so des gecreutzigten
Christi lere zu wider/durch die vnsern erfunden vnd
auffgerichtet sein / vnder dem namen alter religion
vnd Römischen kirchen/zuertheidigen für hast / so
mustu dich mit solchen schmehe Worten fürwar
nicht erfür thun / sonder den selbigen deinen/hass
vnd neid/daran wir sonderlich gefallen tragen/mit
gleissender falscher demut vnd sanfftmut / etwas
schmucken

schmucken / sonst wird dein anhang / der vnserem
eingeben vnd deinen anschlegen vnwissent zugethon
ist / deine sachen verdecktig achten / vnd vnserm Reich
also nicht ein geringer abbruch geschehen / kanstu
nicht aus einem falschen lügenhafftigen hertzen / zu
weilen ein gut vnd im schein ein Christlich wort ge-
ben ? kanstu nicht vns / deinen Gott / vnd herrn im
hertzen haben vnd behalten / vnd gleichwol in allem
deinem thun / Christum / Christliche religion / Veter/
Concilia / löbliche vnd von alters her gebrachte Cer-
emonien im mund haben vnd fürwenden ? Es
machen dich nur diese vnd der gleichen scheltwort/
viertelmessiger / verreterischer / meineidiger / fleischbö-
sewicht. Item schlechter / grober Knüttel / Item Ertz-
loser verreter / Ertzfelscher / ertzlügenner etc. je lenger je
verdecktiger. Aus vrsachen / das etliche meinen wer-
den / weil du dich nicht könnenst vorantworten / so
wöllest du mit weibischem schelten die sache ausrich-
ten. Vnd ob wol solche scheltwort in vnser Reich
gehören / so wollen vnd sollen sie dennoch der massen
geferbt sein / das sie nicht da für / als kernen sie aus
einem neidigen hertzen / vnd einem gewissen das sich
schuldig fület / angesehen werden. Denn liegen vnd
dichten ist kein kunst / wie auch vorhin angetzigt /
sonder einer guten groben / feisten lügen eine gestalt
gebē / das ist ein kunst die in vnserm Reich im swang
gehn sol.

Du vermeinst wol / weil du ein Fürst des Reichs
seiest / vnd schutz von vns habest / es werde nu Dans
Koch schweigen müssen / vnd dir nicht antworten
dörffen / es wird dir aber weit felhen / denn ick ver-
mercke

mercke das er schon in der erbeit ist / vnd wirt dir
auch mit der warheit ein liedlein singen / das dir
nicht fast lustig zuhören sein wirt / nicht das vns et
was an deinen thaten misfallen könne / sonder das
wir wolten / du ein solcher vns verwanter hauptman
vnd held / hettest dich in eines diebhenckers person
der massen nicht dargegeben / wenn er dich nu wider
rumb schilt / vnd dir deine gute werck / so bey vns
gantz ehrlich / bey vnsern widersachern aber / den
Christen / gantz vnehrlich / gehalten werden / fürsagt /
Wes ist denn die schult ? wem wiltu es klagen ? ja
wenn du es gleich klagen wirst / so werden alle deis
ne gute freunde sagen / dir geschehe recht / darumb
das du dich aus einem fürsten selbs zu einem diep
hencker gemacht / vnd öffentlich dargegeben habst.
Wir wolten dir deine an den von Goslar / Doctor
Dellingshausen / Dieterich Schnellen / vnd andern
mehr / begangen diephenckers stücke / wie nicht vn
billich / gerne helffen zudecken vnd schmücken / so
wiltu ein diephencker one vnsern danck sein. Vnd
siehe zu das nicht etliche sagen werden / Es habe
Dans Koch alle böse stück / so du im zumiffest / wenn
er dieselbigen gethon hette / nicht von sich selbst / son
der von dir gelernet / denn wer hat mehr / da er zu
Langessen sass / von im gehalten / als eben du selbst ?

Doch dem sey wie im wölle / so sind zweierley
ding / in dieser sacht / die man wider dich vnsern lie
ben getrewen zum ersten deuten wird. Erstlich das
er sich glimpfflich verantwortet / vnd zu recht vor
einem yden vnparteyischen Richter erboten hat / Den
solchs soltestu / wens gleich dein ernst nicht were ge
wesen

B

wesen

wesen/angenomen/vnd aber doch/wenn du dein vor
teil an jm ersehen/dein glück an jme versücht haben.
Zum andern/machet dich auch das verdecktig/das
du dich in deinem schreiben vernemen lassst/du
wöllest vnd künnest/ gemelten Dansen seiner verres
terey reichlich vberzeugen/vnd bittest nicht destowe
niger/das jne der Landtgraff/auff das er seiner bos
heit nicht teilhafftig werde / von stundan auff ein
radt stossen oder vierteilen lasse. Wie wil sich lieber
getrewen das reimen? Du erbeutest dich/alles was
du von jm geschriben habst/zu beweisen/vnd beget
rest gleichwol das man jne vnerkantes rechts von
stundan vierteilen sol / Da werden vnser vnd deine
widersacher vngeweißelt sagen / Kanstu solcher
bosheit / deinem erbieten nach/Dansen Koch vber
zeugen/Was begerest du denn/das er von stundan ge
vierteilt werde? Warumb thust du denn nicht solche
deine beweisung auff dem künfftigen Reichstage?
Kanstu aber solche seine bosheit nicht beweisen/
Warumb lestest du denn den groben pawren nicht
zu frieden? Sie also legest du vns hie ein schand ein/
der man wol hette müßig ghen können. Können dir
aber gleichwol alles weil es aus einem rechten blut/
durst geschicht / wol zu gut halten / allein das wir zu
sehen/das wir vnser sache mit so vnzeitigem liegen
nicht selbs verderben/etc.

Weiter schreitest du fort/vñ greiffest den Landt/
grauen an/mit dingen/die einen solchen/vns vnd dir
widerwertigen fürsten/wol künden verhasset mach
en/das wir darnach vnser glück dermal eins an jme
versuchen möchten. Aber wir tragen grosse sorge/
weil sol

weil solche lügen zuviel grob/gemeinet/vnd begreifflich
lich sein/es werde dir hierin niemand glauben geben.
Es wirt dir auch gewislich dieser griff/damit du zu
vermeinst verhasset zu machen / selben / Weil alles
was du sagest/ein loss geschrey vnd gerücht ist. Denn
wo er solche dinge verleugnen vnd nicht gestehen
wird/wo mit wilt du es denn/als mit einem schlech-
ten gerücht vnd geschrey/war machen? Der Keiser/
König/Chur/Fürsten vnd Stende des Reichs/wer-
den freilich auff ein loss geschrey/keinen Fürsten sei-
ner ehre vñ lands so baldt entsetzen/wie du vileicht/
das geschehen sein solte/vermeint hast.

Denn erstlich das ander weib belangent / so er
genommen haben soll/hören wir wol ein geschrey das
non / können aber noch zur zeit keinen grundt bek-
men/ob es war oder nicht war sey/viel weniger könn-
en wir erfahren/ob es mit einiger solennitet gesche-
hen/oder nicht geschehen sey. Wenn aber solche din-
ge mit öffentlicher solennitet geschehen weren / vnd
er der Landtgraue ein new Jus damit einzuführen
gedechte / wie wir doch nicht glauben/das er thun
werde / so würde er vnserm Reich/in welchem wir/
dem gecreutzigten Christo zu wider/allerley hurerey/
ehbrecherey / so bey den Deutschen / des gleichen
Knabenschenderey/florentzerey/so bey frömbden Na-
tionen gemein sein leiden können vnd wollen / nicht
einen geringen abbruch thun/vnd möchten der hal-
ben erleiden/weil die widersacher zeneckisch vnd one
zweiffel mit antwort / vns vnd dich zu veriren ge-
fasset sein möchten/du hettest vnserm Reich zu eh-
ren/diese sach nicht angeregt.

B ij

Swar

Zwar dein frage/damit du fragest/mit was fu/
gen/grundt oder bestandt/mit welcher Biblischer
schriff/mit was erleubten oder zugelassen vrsach/
en/in solchem fal sich der Landgrauē beschönē wöl/
le/ist der massen von deinem vnbedeichtigen dichter
gestellt / das man vns disputirlicher weise/ weidlich
damit verpiren kün̄te. Denn das in Biblischer schriff/
ten weder exempel noch andere vermeldunge / nicht
sein/oder geschehen solte / darin felet er weit / Aus
vrsachen / das im funfften Buch Moyses am ein
vnd zwentzigsten sonderlich gesetzt ist / wie sich ein
man/der zwo frawen/vnd von beiden kinder habe/
gegen die selbigen kinder sich in der ertheilung hal/
ten sol.

Des gleichen haben sie herliche vnd heiliger
leut Exempel / die dennoch durch die Propheten/so
doch alle laster straffen / als ein dispensation ge/
duldet/vnd nie als ein verdamlich ding angegriffen
worden sein. Denn sind nicht bey irem Gott heiliz
ge leut gewesen/Abraham/ David / Melcana/ Joas
vnd andere mehr? Demnach ist von dir dörlich ges/
schehen / das du inen das Alte Testament in diesem
fall nach lesest / sonderlich wenn du dich mit inen
in disputation zu geben gedechtest. Nicht das sie
solchs/du gebest es nach oder nicht / etwas achten/
sonder das sie dich / als einen vnerfarnen in der
schriff/vnd einen elenden Meintzen zuverpiren/ dispu/
tatiue/lust haben werden. Lessest du inen denn nicht
das Alt / sonder das New Testament zu / vnd fras/
gest / wo im selbigen die digamia zugelassen sey/so
wirstu von stund an hören/wo denn/in vnuermeid/
lichen

lichen notwendigen sachen / die selbige dispensatio
on verboten sey? Werden dich dar nach rollen mit
dem spruch Pauli / ein Bischoff sey eins weibs man /
vnd diese frage thun / wenn zur zeit der Apostelen
der brauch / ein kebs weib zu haben / nicht gewesen
ist / warumb verbeut denn der Apostel / das ein Bis
choff nicht mehr denn ein frau haben sol? solch ver
bot wer je vergeblich / wenn zur solbigen zeit / die di
gama im brauch nicht gewesen were.

Über das werden sie dir den Keiser Valentinianum
mit seinem gesetz für die nasen halten / vnd sa
gen / weil der selb ein trefflicher fromen Keiser gewes
sen / vnd seiner digamey halben / nie von den geleerten
der selbigen zeit / angegriffen worden sey / warumb
das man denn nun / ander büberey zu vermeiden / ein
disputation mit einem kebs weibe nicht leiden solle?
Sind vielleicht mit mehr exempeln gefasset / were der
halben besser / du hettest solche sachen schlaffen lassen /
denn was ghet dich an solch narren werck? Siehe
aber zu / das du vns glauben haltest / vnd nicht auch
etwas im sinn habest / das vnserm Reich zu nachteil
reichen möchte / vnd wenn du gleich solchs im sinn
nicht hast / wie wir vns denn zu dir versehen wöllen /
so hastu dennoch in anregung dieses artikels dörlich
gethon / das du deinen widersachern so viel ursach /
deine geübte handlung mit Juncckfrauen vnd frau
wen / dir widerumb für zu werffen / gegeben hast.

Vnd wird freilich hie müssen herhalten / der arm
geperender geist zur Strauffenburg / denn der selb
ge / ob er wol aus vnserm nachgeben / so lang bey dir
gewesen / vnd haus mit dir gehalten hat / vns auch

B ij

solche

solche that gar nichts zu wider/sonder viel mehr löblich anseheth / so ist dennoch sorge dabey/das die jesnigen so vermeinte Christen sein/solche that vbel schelten werden/denn erstlich werden sie dir das hoch auffnutzen/wie ich denn höre/das der Landtgraue itzt in seinem dritten ausschreiben / schon gethon habe/das du die Junckfraw in deinem eigen brod/in deines gemahels frawenzimer/vnangesehen jrer eltern vnd freundschaft dienste/dir trewlich geleistet / solt geschandt haben. Zum andern/das du sie/nach dem sie geschandt / den eltern gestolen/vnd mit groben lügen/bis auff diesen tag/für enthalten/vnd dich damit plagyreum gemacht habest. Zum dritten/das du zur zeit da sie gestorben sein solte / ein affenspiel mit vigilien vnd Seelmessen gar nerrischer weise/durch die münch zu Sandersheim/angerichtet/vnd damit/was du von dem Gott des Himmels haltest / angezeigt haben sollest. Vnd das dir denn bey deinen Religions verwandten/solches sonderlich lob bringen solte / wirts nicht thun. Doch weil die sache durch deine selbst vngeschicklichkeit an den tag komen ist/so wil dennoch leugnen von nöten sein/vnd kanst es mit solchen worten verantworten/wer solches sänge oder sage/der solle es liegen vnd dichten / als ein ehrloser verzweifelter bösewicht/wissen dir dis mals nicht weiter zuhelffen.

Ob sie denn auch wissen wolten/wo/wenn/vnd an was Franckheit sie gestorben were / so las deinen Justinum warsager von Warheitsbrun dauon/vñ gib gar kein antwort drauff. Denn weil gemelter Justinus den Landtgrauen mit zu viel groben lügen angelogen

gelogen/vnd also seinem namen nicht gnug gethan
hat/so möcht er yrgent in dieser antwort / noch sei-
nem namen gnug/vnd das maul zu weit auff thun
wollen/vnd vns solche in vnserm reich ehrliche sache
gar verderben. Doch kanstu sagen/nihil interrogans
tes propter conscientiam.

Ob sie dir denn auch die ander Junckfraw aus
dem Landt zu Dessen wörden fürwerffen / so halt
dich abermal wie obangezeigt / vnd nach dieser re-
gel/si fecisti nega. Gib aber den selbigen lügen etwa
ein gestalt/damit die sache vnuermerckt bleibe / sonst
wirstu der mal eins/vns vnd dich zu schanden mach-
en. Du soltest aber deine widersacher dermassen an-
greiffen/das sie nicht verursachet wörden/dir deine
thaten/so sie für vnrecht/wir aber für recht halten/
widerumb auff zurucken.

Denn eigentlich werden sie es nun bey deiner
person in diesem fall nicht lassen/sonder werden
auch andere verwandten vnser Reichs/mit irer vns
ausprechlichen hurerey / florentzerey / vnd Knaben-
schenderey/auff das hertest angreifen / vnd fragen/
obs nicht besser were/wenn je eins sein solte/ein Con-
cubin oder Lebsweib haben/denn mit solchen graus-
samen lasteren vnd sünden besudelt werden? Vnd ha-
ben zwar sorg/es werden sich vnser widderacher/
mit erzehlung solcher thaten/nicht einen geringen zu-
fall/weil die sachen zu Rom so offenbar sein / mach-
en. Wes ist aber denn die schuldt/das wir solchs hö-
ren müssen/denn eben dein/der du den widersacher
ursach darzu gegeben hast?

Auff solche weise wirt dir auch ghen/mit dem
artickel

artikel den widertauff belangend. Denn ob wol etliche der selbigen Secten anhengig / in des Landtgraue lande befundē / so wil dennoch daraus noch nicht volgen / das er der Landtgraue drummb auch ein sein müsse / vnd wenn du gleich sagen wilt / er mache sich in dem dieser Secten teilhafftig / das er sie nicht straff / so wirstu doch nicht damit bestehen / denn ich weis mich wol zuerinnern / das zu Wartzburg etliche gesteuert vnd mit brandtzeichen gezeichnet / vnd also des landes verwiesen worden sein. Itetliche haben öffentlich widerruffen / vnd sind widerumb auffgenommen / etliche sitzen noch in swerem gefencnis / darin sie weil kein besserung da ist / verharren vnd bleiben müssen / vber das lesset er je seine Kinder Tauffen / vnd müssen solchs alle seine vnderthanen auch thun / wenn du denn von denen sagen wilt / die heimlich vnder im dieser secten anhengig sein / so wird dir die antwort begeggen / wer jemals gehört habe / das die Oberkeit von dingen / so niemant wisse oder auch nicht offenbar seien / vrteil fällen / vnd mit der straffe da zu thun solle?

Wir müssen aber hie bekennen / das sich der Landtgraue zuviel Christlich vnd gnedig in dieser sachen gehalten / vnd zu keinem blut vergiessen / als du vnd deines gleichen / geeilet hat / sonder irer viel / vnd der merer teil in seinem lande / widdrumb zu rechte / vns höchlich zuwider / bringen vnd bekeren lassen. Denn dadurch ist vnser reich nicht gemehret / sonder mercklich geschwecht worden. Wie du das / als ein getrewer diener / aus vnserm eingeben / selbst ermessen kanst.

Die

Die lügen von den dreien Rheten / so sich mit
sine dem Landtgrauen sollen haben Teuffen lassen/
ist zu gar grob/vndwirt bey keinem menschen / auch
deinem eigen adel nicht / glauben finden. Vnd ich
hab hie abermal Sorge/es werde dir ghen/wie ihener
Philosophus sagte/da er gefragt wart/was der lü/
gen lohn were? Denn darauff gab er die antwort/
Einem lügener gebüret der lohn / das man im auch
keinen glauben gebe/wenn er gleich die warheit sag/
te. Wenn nu dieser lohn dir auch / für deine vnge/
schickte grobe lügen zuteil würde/was hettest du an/
ders ausgerichtet / denn einen mercklichen schaden
vnserm Reich gethan? Denn du weist/wenn wir die
lügen verlieren/das als denn wir vnd du sampt vn/
serm reich zu boden gehen müssen. Begeren dem/
nach von dir gnediglich / du wöllest weidlich liegen
vnd triegen/aber den selbigen lügen auch/das sie der
warheit im schein gemes sein/ein gestalt geben. Du
hast deine schreiber vnd dichter auch hierauff zu
warnen.

Belangend den bundtschuch vnd die auffrüris/
schen fenlein/ist abermals dein dichten vnd liegen zu
grob/wie auch in deinem ausschreiben/das gedich/
te vom Türcken ist. Denn wer wil dir hie glauben/
weil die gantze welt weiß / das der Landtgraff die
auffrürischen Pawren bekriegt / dem Bischoff von
Münster so stattlich mit gelt vnd leuten geholffen/
vnd auch seine hülf wider den Türcken alle zeit so ge/
horsamlich geleistet hat? So macht dir auch dein
ungeschickt liegen grossen verdacht / bey denen / die
da wissen/das du vom Landtgrauen in vorzeiten so
E viel

viel guts vnd wolthaten empfangen hast. Wir haben dir vorhin gesagt / liegen sey bey vns / dir / vnd deines gleichen / ein nötige herliche Kunst / sie mus aber gefebet sein vnd ein gestalt haben / sonst macht man sich zu gar verdecktig / vnd dermassen argwöhnig / das vns niemand glauben gibt. Kuntestu nicht / da du vom Türcken schreiben woltest / durch deinen Cantzler ein vermeinte copeny dichten lassen / so der Landtgraue dem Türcken solte zugeschrieben / vnd drauff antwort empfangen haben? Das were auff vnser lügen lauter / ein rechter griff gewesen. Weil du aber die lügen abermals zu grob vnd vngeschickt gemacht hast / so wirt dir auch abermals begegnen / das dir sonst nicht von nöten gewesen were / fragest du was das sey?

Weil du mit deinem vngeschickten liegen den Landtgrauen zum auffrürer nicht machen kanst / so wirt er dich vnter stehen zu solchem man zu machen / vnd kan zwar auch nicht gnug mit dir zürnen / ob du vns sonst vmb deiner getrewen dienste willen wol ein lieber man bist / das du dich in deines Secretariens werbung nicht besser geschickt hast. Welcher Teufel hies in auff Cassel reiten? Kunte er nicht andere wege finden? Dattestu nicht diener die in durch andere land hetten führen können? Tu haben sie die widersacher / dein eigen handt / die memorial zetteln / Steffans handschrift etc. daraus sie vnser fürnemmen zur auffrur vnd blut vergiessen gewaltiglich beweisen werden / O wie wolten wir aber so eine herliche zeche im blut der Lutherischen gehalten haben / wenn du vns durch dein frecheit die sache nicht verderbt

derbt hettest/werden dich vielleicht auch fragen/wo
der pfaff Trettepful/der sich itzo zur Stauffenburg
verloren haben sol/wie man sagt/hinkomen sey.
Zum anderen werden vnser widersacher auch vns
derstehn/dich zum mordtbrenner zu machen. Wes
ist nu die schult/das die selbigen vnser radtschlege
vnd anschlege so gar ausbrechen in diesem fal/als
eben dein? Du hast/wie Gimbeck/Northausen/
Dertzog Philips land/die Graueschafft Ples/die
Marck zu Brandenburg etc. ausweisen/wol fleisses
gnug fůrgewandt/es ist aber je das beste da hinden
geblieben/fragestu was das sey?

Du weist was wir fůr radtschlege haben stel-
len/vnd dir verschaffen lassen/nemlich/das man den
Keiser vnd Kőnig von Franckreich vertragen/mit
dem Tůrcken etliche jar ein anstandt machen/das
verbůndnis zu Nůrnberg auffgerichtet flux erwei-
tern/vñ als denn von stund mit beiden sporen drauff
haben solte. Wenn du nu dem selbigen also nach-
komen werest/ehe denn solcheding aus kamen/so
mőchten wir lengest in der widersacher blut bis an
die enckel gegangen/vnd gut geschir gemacht haben.
Weil aber solchs durch dein nachlessigkeit nicht ge-
schehen/vnd nu vnser fůrnemen so gar lautbar wirt/
so haben wir vns wol fůrzusehen/vnd auff andere
weg zu dencken/Denn dir ist bewust/das erslich der
gecreutzigte Christus wider vns ist. Zum andern ist
auch das gemůt deins Keisers zu gar viel ehrlich/
auffrichtig/from vnd zum fried geneigt. Denn ob
du wol bey seiner Maiestat weidelich aus vnserm be-
felch gelogen/vnd getrogen hast/so hat er dennoch
E ij mit der

mit der gewalt / noch nie vnser widersacher angriffen / oder andern solchs zu thun gestatten wöllen. Es verlassen sich auch auff solche gütē die Lutherischen etwas. Zum drittē siehest du / das auch andere Fürstē / so du doch dir vermeinst geneigt zu sein / nach lessig in dieser sacht gebaren / vnd der erbarkeit vnd billigkeit mehr / denn dem blut vergiessen nach trachten / was sol man mit solchen leuten ausrichten ?

Vnd mus dennoch nicht destoweniger den mutwilligen Lutherischen buben / weil sie mit des gecreutzigten lere / vns so mercklich schaden bisher gethan / vnd noch thun / gesteuert / vnd ein weg mit jnen getroffen sein. Das schreiben vnd schmechen wils nicht aus machen / wöllen dir auch / weiter dich mit schreiben an sie zu machen / du woltest denn trawen deinen lägen ein besser farbe anstreichen / widerraten haben / denn sie möchten dirs mit jren mutwilligen verantwortungen zu viel machen / so weiss ich das sie etliche vnd viel Epigrammata bey jren gelerten / dich bey aller welt damit kundt zu machen auffgebracht haben / habe auch eins drey oder vier von den selbigen / wunderlicher weise jtz newlich bekommen / welche ich dir zur warnung hie mit geteilet haben wil / also lautende.

Immanissimus omnium tyrannus
Crudelissimus omoium tyrannus
Velles Thrasycatarche forte dici
Nam nec dissimulas, & esse quæris.
Si uires quoque nomini coęquas.
Et dignas genio tuo teneres.

Nemo

Nemo immanior omnium tyrannus
Vno te queat esse, quot fuerunt,
Quot sunt, quot reliquis erunt in annis.
Nunc te uiribus omnibus carentem
Exanguem, lacerumque, debilemque,
Non assis facit ille quem petisti.
Plusquam more tyrannico, fidelem
Euergum tibi nuper & fauentem
O in gratior omnibus tyranne.

Item

Quam te persimilem Catilinæ dicere possim,
Quod tibi nunc dicam Thrasycatarche probat.
Maxima proposuit sibi perfidus ille, sed horum
Ducere ad euentum nil potuisse liquet.
Tu quoque quam possis maiora aggressus & ausus,
Omnia cum iactes, nil puto perficies.
Ille sub ingenti cœptorum mole suorum
Occidit, n̄s cœptis tu quoque forte cades.

Item

Si tam Thrasycatarche fores in bella paratus,
Quam uerba suppetunt tibi mendacia.
Quis te ferre queat? quis te tolerarit in armis,
Nemo profecto nemo quantumuis potens.
Nunc quia destituunt ualidæ te in prælia uires,
Pugnare perge, quod facis mandacijs.
Quos tamen hac uinces mendacis imagine pugnae,
Feremus esse mortuas imagines.

Item in scriptorem.

D

Poenitet

Pœnitet & miseret plusquam scriptoris inepti,
Tam male dissimiles qui facit esse pares.
Namque quid Euergo similis Catilina uideri,
Dic age, quo pacto, qua ratione potest.
Aut qua dissimilis Catilinæ parte uideri,
Ille tuus Phalaris scriptor aselle potest:
In eundem.

Vir fortasse bonus potuisses esse uideri,
Si scripto hoc uelles abstinuisse manus.
Nunc illum quem tu frustra defendere quaris,
Contactum uitæ omnibus esse doces.
Hoc dedit inuidie rabies tibi cæca malignæ
Quæ lucem uero non finit esse suam.

Warumb sie aber dich hie Thrasycatarchum/
vnd den Landtgrauen Euergum heissen / werden
dir deine gelerten aus dem gemma gammarum wol
anzuzeigen wissen / wo zu wil nu die lenge solch schrei
ben dienen / wenn wir vns nicht schicken auff die lan
gen federen / so die lieben Landtsknecht tragen? Den
noch wollen wir im also thun.

Wir sampt vnserm hellischen heer vnd sonder
lich vnsern Kriegs Kethen / als Beezebub / Rhadas
mantus / vnd Federwisch / wollen solche sache auff
forderlichst beradschlagen / vnd was zuthun sein wil
beschliessen / vnd dir von stundan kundt thun. Des
gleichen soltu mit deinen hippenbuben dem Cantz
ler / Doctorn vnd schreiberen auch thun / vnd vns
solchs von stundan zuschicken / deine Godeleut / mag
stu zum

Ku zum teil dabey nemen/sonderlich die zur ehre ni/
cht grosse liebe haben / wie denn sein Balthasar
Stechaw/Dunaw etc. Denn die anderen wöllen die
sache zu weitleufftig bewegen / vnd der erbarkeit zu/
viel nach dencken/welchs aber vns vnd dir nicht ges/
legen sein wil/was wir denn in rath auff beiden sei/
ten fürs beste ansehen/sol mit grösserm ernst vnd ei/
len/denn bisher / geschehen/ausgerichtet werden/in
vnserm namen.

Eins müssen wir dich noch erinnern/weil du be/
rühctiget wirst du sollest dich mit deinem eheweib
vbel begehen/die selbigen schlagen vnd nicht Fürst/
lich halten / du wöllest dich doch im schein etwas
Fürstlicher gegen sie halten/nicht das vns ehelicher
leut liebe sonderlich gefalle/oder zum guten lust has/
ben/sonder das man dennoch andern Fürsten vnd
herrn/ damit sie dir in deinem fürnemen nicht ab/
fallen / etwas hofirn muss. Dis alles haben wir dir
gnediger meinung/damit du dich auff ein ander zeit/
in deinem schreiben vnd liegen bass fürsehest / nicht
verhalten wöllen/vnd sind dir mit allen gnaden ges/
neigt. In hoffnung/du werdest in kurtz selbs mit al/
le deinem anhang bey vns sein. Datum in vnserm
hellischen schlos Stauffenburg/ in der Karwochen
vor der fastnacht. Anno etc. xli.

Eingelegte zeddel in diesen Brieff.

Auch lieber getrewer wirt vns angezeigt/Du sol/
lest itzo in dein Kleidung/einen fuchs der einen hanen
im mund hab/vnd mit jm weg lauffe / dem Landts/
grauen/ der diesen winter ij. Kempffende hanen ges/
fürht/ zuwider gemacht vnd zu führen verordenet has/
ben. Wies

D ij

ben. Wies

ben. Wiewol wir nu gern wolten / du hettest den
Landtgrauen lengest gefressen / So hastu dennoch
solchs auch nicht wol bedacht / Denn der han / wie
ire lerer sagen / sol bedeuten das liecht des gewissens /
so aus dem hanen geschrey / das ist / durchs wort /
den Christen vnsern feinden gegeben werde. Der
fuchs aber sol symbolum tyrannorum sein / derhalb
ben den auch vnser widerwertiger der Galileer Chris
tus vnsern lieben getrewen den könig Herodem / ei
nen fuchs geheissen haben solle. Wiewol wir nu wes
der von hanen / noch von Christen / noch vom wort /
noch gewissen / vnd der gleichen fantasey etwas halt
ten / So sehen wir aber doch / das du inen abermals
vrsach / dich weidlich zu rollen mit deiner vnbedeck
tigkeit / gegeben hast / denn sie werden nu frey sagen /
du selbs zeigest hiemit an / das du der fuchs Herod
des / vnd sie die armen Christen sein / die du alle
zu fressen für habest. Zu dem werden sie dich auch
weidlich mit dem merlin vom fuchs vnd hanen zu
veriren anfahren / vmb welche es ein solche gestalt
hat / Es hat etwa ein fuchs einen hanen erhaschet /
vnd den selbigen so baldt fressen wollen / Fraget der
han ob er auch ein Christ were / Antwort der fuchs /
ja / da sagte der han / warumb wiltu mich denn fres
ssen / ehe denn du dein benedicite gelesen hast ? Sagte
der fuchs / wolan so wil ich vorhin beten. Wie er nu
das benedicite zu lesen anfieng / floch der han auff
den baum vnd lachet sein / Da sagt der fuchs / Nu
wil ich nimermehr das benedicite lesen / ich hab den
das gratias im leib. Auff solche weis werden die
Lutherischen sagen / sol es hertzog heintzen auch ges
hen / denn

hen / denn wenn er meint er hab die Lutherischen
alle erhaschet / vnd wolle sie itzt einschlingen / werden
sie oben auff dem baum sicher sitzen / vnd sein dazu
in die faust lachen. Lieber Weintz sey doch nicht so
vnbedechtig / vnd gib nicht so liederlich vrsach den
widersachern dich als einen armen Weintzen zuueris
ren / Sie wissen on das mehr von vns / denn vnserm
handel nütz vnd gut ist. Datum vt supra.

Post Scripta. Wir mögen dir auch noch eins nicht
bergen / das wir erst heut noch dato disß brieffs / in
erfarung komen sein / wie du durch deine geschick
lichkeit / damit du in vnsern vnd vnserß Reichs sachs
en / für andern begabt bist / denen von Brauns
schweig etliche Keiserliche mandata vnd stillstandt /
bis in den v. monat / durch deine Kette vnd diener
fürenthalten / vnd dazwischen / die deinen etliche der
von Braunschweig burger vnd ire güter zu Lutter
auffgehalten / geplündert vnd beschedigt / Auch dar
nach etliche fass mit Limbeckischem bier zu Ganz
dersheim ablegen / folgets einen irer burger mit was
gen pferden vnd fassen Goslarisch bier / zur Lewens
burg abtreiben etc. vnd anders mehr gewalts brauch
en lassen haben sollest. Denn als wir bericht emp
fangen / so halten dir Keiserliche mandata im dato
den xxviij. Octobris An. etc. xl. so sollen sie den von
Braunschweig durch etliche deine diener / als von
wegē Kei. Mai. erst insinuiert wordē sein / den xi. Mar
tij An. xli. das sie also zu letzt im v. monat / wie ges
melt / solcher mandata innen worden sein etc. Tu ha
ben wir wol erslich auff solchen handel achtung ges
habt /

Habt/vnd gehofft/er solt vns besser angangen / vnd
zu weiterm raub/niderwerffen/todtschlegen/beraus-
bung vnd veriaugung witwen vnd weisen/geraten
sein/alles zu erbreiterung vnser Reichs/vnd verhin-
derung vnser widerpart sachen/Es ist aber leider on-
frucht abgangen / denn du hast dich in dem zuuiel
grob vnd vngeschickt gehalten/das du die Kei. man-
data also bey dir / des du keinen befelch hast/vnder
druckest/vnd mitler zeit rauben/niderwerffen/schleis-
ffen /vnd andere gewaltsame stück brauchen lassest.
Solchs ist auch zuuiel vngeschickt verschlagen/wirt
dir für ein öffentliche felonei/verreterey vnd vntrew
geachtet. Vnd wenn die von Braunschweig diesel-
big vnser vnd deine practiken auff itzigen Reichstag
(als sie für haben) Kei. Mai. klagen/werden sie es
dermassen darthun/ das wir vns besorgen/du wer-
dest vns eins mals gröblich empfallen / dich / vns/
vnd alle vnser verwandten/in ewig schand/schaden/
schimpff/laster vnd verderbe füren. Denn du hast zu
bedencken / das du Kei. Mai. in dem zuuiel vnuer-
schempt/vnbedacht / vnd als ein vngehorsamer/verz-
letzt vnd angetast/in dem das du ire brieff vnd man-
data also generlich/dieplich vnd reuberisch hinder-
halten hast/was dir drauff deiner Fürstlichen ehe-
ren trewe pflicht vnd glaubens halb / gegen irer
Mai. stehet/ das hastu zuermessen. Empfellestu vns
denn dermassen/als wol geschehen kan / so bistu vn-
ser rechten zimlich bericht / was dir / deiner seele/
eheren vnd guts daraus folgen wirt. Wöchten lei-
den/du hettest Keiserliche Maiestat dermassen in vn-
sere vnd deine sach nicht gemischt etc. Das ist aber
in der

in der eil vnser rath / das du diese sach wie die and
dern / mit liegen / triegen / schenden / lestern vnd blass
rucken bedeckest vnd dich auswickelst so viel du
kannst. Welchs wir deiner geschicklichkeit dis
mals also müssen heimstellen / wil das hel
ffen / so hast du es zum besten / wo
nicht / so helff vnser Hellisch fexor /
A M E N.

Gedruckt in V T O P I A.

Faint, illegible text, possibly bleed-through from the reverse side of the page.

Gedächtnis VTOPIA.

Faint, illegible text, possibly bleed-through from the reverse side of the page.



Für Gott stehet mein Hoffmüß

Laurenz Ditzler

Anno 1565

Ms 1076

ULB Halle


3


002 715 171




56.







G.



Expostulation vnd
strasschrifft Satane des
Fürsten dieser welt / mit
Hertzog Heintzen von
Braunschweig / seinem ge-
schworen diener vnd lieben
getrewen / das er sich vnbil-
licher weise / in der person
eins Diephenckers wider
den Landtgrauen / nicht one
mercklich nachteil / seines
Reichs / mit vnge-
schicktem liegen
eingelassen
habe.